

東漢會要





東漢會要卷四

宋

徐

天

麟

撰

禮二 吉禮

北郊

光武中元元年初營北郊在洛陽城北四里為方壇四  
陛明年正月辛未郊別祀地祇位南面西上高皇后配  
西面北上皆在壇上地理祭神從食皆在壇下如元始  
中故事中嶽在未四嶽各在其方孟辰之地中營內海  
在東四瀆河西濟北淮東江南它山川各如其方皆在



外營內四陞駸及中外營門封神如南郊地祇高后用  
饋各一頭五嶽共牛一頭海四瀆共牛一頭羣神共牛  
二頭奏樂亦如南郊既送神瘞俎實于壇北

祭祀志

明堂 辟雍 靈臺

光武中元元年初營明堂辟雍靈臺未用事明帝卽位  
永平二年正月辛未初祀五帝於明堂光武帝配五帝  
坐位堂上各處其方黃帝在未皆如南郊之位光武帝  
位在青陽之南少退西面牲各一犢帝及公卿列侯始  
服冠冕衣裳玉佩紉履以行事奏樂如南郊禮畢登靈

臺使尚書令持節詔驃騎將軍三公曰今令月吉日宗  
祀光武皇帝于明堂以配五帝禮備法物樂和八音詠  
祉福舞功德具班時令勅羣后事畢升靈臺擊元氣吹  
時律觀物變羣僚藩輔宗室子孫衆郡奉計百蠻貢職  
烏桓滅貊咸來助祭單于侍子骨都侯亦皆陪位斯固  
聖祖功德之所致也朕以闇陋奉承大業親執圭璧恭  
祀天地仰惟先帝受命中興撥亂反正以寧天下封泰  
山建明堂立辟雍起靈臺恢宏大道被之八極而嗣子  
無成康之質羣臣無呂旦之謀盥洗進爵踧踖惟慚素



性頑鄙臨事益懼其令天下自殊死以下皆赦除之百僚師尹其勉修厥職順行時令敬若昊天以綏兆人三月臨辟雍初行大射禮祭祀志及本紀

永平八年臨辟雍養三老五更

章帝建初三年正月宗祀明堂禮畢登靈臺望雲物

元和二年二月幸泰山柴告岱宗進幸奉高壬申宗祀

五帝于汶上明堂

本紀詳見雜祭祀條

和帝永元五年祀五帝于明堂遂登靈臺望雲物

永元十四年臨辟雍饗射

順帝陽嘉元年臨辟雍饗射

二年十月行禮辟雍奏應鍾始復黃鍾作樂器隨月律

永和元年宗祀明堂登靈臺改元大赦

漢安元年正月癸巳宗祀明堂大赦改元

靈帝熹平六年十月帝臨辟雍並紀

明堂及靈臺令各一人掌守明堂靈臺掌候日月星氣

皆屬太史百官志

### 宗廟

光武帝建武二年正月立高廟于雒陽四時祫祀高祖



為太祖文帝為太宗武帝為世宗如舊餘帝四時春以正月夏以四月秋以七月冬以十月及臘一歲五祀三年正月立親廟雒陽祀父南頓君以上至春陵節侯時寇賊未夷方務征伐祀議未設至十九年盜賊討除戎事差息於是五言中郎將張純與太僕朱浮奏言禮為人後者則為之子既事太宗太宗謂元帝則降其私親今禘祫高廟陳序昭穆而春陵四世君臣並列以卑廟尊不合禮意昔高帝以自受命不由太上宣帝以後私祖不敢私親故為父立廟獨羣臣侍祠臣愚謂宜除今親廟

以則二帝舊典願下有司博採其議詔下公卿大司徒戴涉大司空竇融議宜以宣元成哀平五帝四世代今親廟宣元皇帝尊為祖父可親奉祠成帝以下有司行事別為南頓君立皇考廟其祭上至春陵節侯羣臣奉祠以明尊尊之敬親親之恩時議有異不著上可涉等議詔曰以宗廟處所未定且祫祭高廟其成哀平且祠祭長安故高廟其南陽春陵歲時各且因故園廟祭祀園廟去太守治所遠者在所令長行太守事侍祠惟宣帝有功德其上尊號曰中宗于是雒陽高廟四時加



祭孝宣孝元凡五帝其西廟成哀平三帝主四時祭于  
 故高廟東廟京兆尹侍祠冠衣車服如太常祠陵廟之  
 禮南頓君以上至節侯皆就園廟南頓君稱皇考廟鉅  
 鹿都尉稱皇祖考廟鬱林太守稱皇曾祖考廟節侯稱  
 皇高祖考廟在所郡縣侍祠張純傳及祭祀志  
 光武皇帝崩明帝即位以光武帝撥亂中興更為起廟  
 號曰世祖廟以元帝于光武為穆故雖非宗不毀也後  
 遂為常祭祀志  
 明帝永平三年十月蒸祭光武廟初奏文始五行武德

之舞詳見樂類

明帝臨終遺詔遵儉無起寢廟藏主于光烈皇后更衣

別室志云光武廟更衣孝章即位有司奏言孝明皇帝聖德淳

茂功烈光于四海仁風行于千載而深執謙謙無起寢

廟掃地而祭除日祀之法省送終之禮遂藏主于光烈

皇后更衣別室臣以為更衣在中門之外處所殊別宜

尊廟曰顯宗其四時禘祫于光武之堂間祀悉還更衣

共進武德之舞如孝文皇帝祫祭高廟故事制曰可紀

章帝臨崩遺詔無起寢廟廟如先帝故事和帝即位不



敢違上尊號曰肅宗後帝承尊皆藏主于世祖廟積多  
 無別是後顯宗但為陵寢之號永元中和帝追尊其母  
 梁貴人曰恭懷皇后陵以竇后配食章帝恭懷皇后別  
 就陵寢祭之初有司奏言孝章皇帝崇宏鴻業德化普  
 洽垂意黎民留念稼穡文加殊俗武暢方表戒惟人面  
 無思不服巍巍蕩蕩莫與比隆周頌曰於穆清廟肅雍  
 顯相請上尊廟曰肅宗共進武德之舞制曰可本祀文  
祭祀志

和帝崩廟號穆宗本紀

殤帝生三百餘日而崩鄧太后以尚嬰孩故不列于廟

就陵寢祭之而已祭祀志

安帝以清河孝王子卽位建光元年追尊其祖母宋貴  
 人曰敬隱后陵曰敬北陵亦就陵寢祭太常領如西陵  
 追尊父清河孝王曰孝德皇母曰孝德后清河嗣王奉  
 祭而已祭祀志

安帝以讒害大臣廢太子及崩無上宗之奏後以自建  
 武以來無毀者故遂常祭因以其陵寢之號而稱恭宗

祭祀志

順帝卽位追尊其母曰恭愍后陵曰恭北陵就陵寢祭



如敬北陵祭祀志

順帝崩有司奏言孝順皇帝宏秉聖哲龍興統業稽乾則古欽奉鴻烈寬裕晏晏宣恩以極躬自菲薄以崇元默遺詔貽約愼念萬國衣無製新玩好不飾瑩陵捐狹不起寢廟遵履前制敬勅慎終有始有卒孝經曰愛敬盡于事親而德教加于百姓詩云敬慎威儀惟民之則臣請上尊號曰敬宗廟天子世世獻奉藏主祫祭進武德之舞如祖宗故事露布奏可東觀漢記冲帝賢帝皆小崩梁太后以殤帝故事就陵寢祭凡祠

廟訖三公分祭之祭祀志

桓帝以河間孝王孫蠡吾侯即位亦追尊祖考王國奉

祀八王傳

桓帝崩上尊號曰威宗無嗣靈帝以河間孝王曾孫解

瀆侯即位亦追尊祖考祭祀志

靈帝時京都四時所祭高廟五主世祖廟七主少帝三

陵追尊后三陵凡牲用十八太牢皆有副倅故高廟三

主親毀之後亦但殷祭之歲奉祠決疑要注曰毀廟主

之中有石函名曰宗祏函中有筭以盛主親盡則廟毀毀廟之主藏于始祖之廟一世為祧祧猶四時祭之二



東漢會要 卷四  
世爲壇三世爲壇四世爲鬼  
祿乃祭之有禱亦祭之並志

初平中蔡邕等以和帝以下功德無殊而有過差不應  
爲宗及餘非宗者追尊三后皆奏毀之四時所祭高廟  
一祖二宗及近帝四凡七帝古不墓祭漢諸陵皆有園  
寢承秦所爲也說者以古宗廟前廟後寢以象人之居  
前有朝後有寢也月令先薦寢廟詩寢廟奕奕言相通  
也廟以藏主四時祭寢有衣冠几杖象生之具以薦新  
物秦始出寢起于墓側漢因不改故陵上稱寢殿起居  
衣服象生人之具古寢之意也

祭祀志

梁太后臨朝以殤帝幼崩廟次宜在順帝下太常馬訪  
奏宜如詔書諫議大夫呂勃以爲應依昭穆之序先殤  
帝後順帝詔下公卿大鴻臚周舉議曰春秋魯閔公無  
子庶兄僖公代立其子文公遂躋僖公于闕上孔子譏  
之書曰有事于太廟躋僖公傳曰逆祀也及定公正其  
序經曰從祀先公爲萬世法也今殤帝在先子秩爲父  
順帝在後于親爲子先後之義不可改昭穆之序不可  
亂呂勃議是也太后從之遂下詔曰孝殤皇帝雖不永  
休祚而卽位踰年君臣禮成孝安皇帝承襲統業而前



世遂令恭陵在康陵上先後相踰失其次序非所以奉宗廟之重垂無窮之制昔定公追正順祀春秋善之其令恭陵次康陵憲陵次恭陵以序親秩爲萬世法

本紀

周舉傳及

獻帝元初二年有司奏議宗廟迭毀左中郎將蔡邕議曰漢承秦滅學之後宗廟之祭不用周禮每帝卽世輒立一廟不止于七不列昭穆不定迭毀孝元帝時丞相匡衡御史大夫貢禹始建大議請依典禮孝文孝武孝宣皆以功德茂盛爲宗不毀孝宣尊崇孝武廟稱世宗

中正大臣夏侯勝猶執異議不應爲宗至孝成皇帝議猶不定太僕王舜中壘校尉劉歆據經傳義處不可毀上從其議古人據正重順不敢私其君父如此其至也後遭王莽之亂光武皇帝受命中興廟稱世祖孝明皇帝政參文宣廟稱顯宗孝章皇帝至孝然然仁恩博大廟稱肅宗皆方前世得禮之宜自此以下政事多黷權移臣下嗣帝殷勤各欲褒崇至親而臣下懦弱莫敢執夏侯之直今聖朝遵古復禮以求厥中誠合事宜孝元皇帝世在第八光武皇帝世在第九故以元帝爲考廟



東漢會要 卷四 九  
尊而奉之孝明遵述亦不敢毀孝和以下穆宗威宗之  
號皆宜省去五年而再殷祭祫食于太祖以遵先典議

遂施行

袁紀及  
志注

臣天麟按古者天子七廟三昭三穆與太祖之廟而  
七其制則外爲都宮太祖在北三昭三穆以次而南  
周以后稷始封文武受命而王是以三廟不毀與親  
廟四而七非有后稷始封文武受命之功者皆當五  
廟而迭毀親親之殺示有終也西都草創禮制缺畧  
諸帝之廟各自居陵旁立之其都宮之制昭穆之位

不復如古然猶不失獨專一廟之尊也郡國之立祖  
宗廟京師之立原廟雖背經違古然猶幸罷廢於中  
世之後也元帝時貢禹建迭毀之議韋元成匡衡劉  
歆等考據明白本末具在世祖中興固望其一正典  
禮以合先王七廟之制考之于史建武所立親廟四  
言者首議其非永平所立世祖廟又與高廟異處無  
復昭穆之序明帝臨終遺詔藏主于光烈皇后更衣  
別室章帝而下莫敢或違徒務爲抑損之私而不知  
禮義之正末年遂至高廟五主世祖廟七主其瀆亂



不經未有如是之甚者噫東都儒者如張純朱浮曹  
褒鄭元之儔皆號稱明習典禮而獨不能復古人七  
廟之制魏晉循之遂不能革而先王宗廟之禮始盡  
廢矣惜哉

### 禘祫

建武十八年光武幸長安詔太常行禘禮于高廟序昭  
穆父爲昭南向子爲穆北向二十六年有詔問張純禘  
祫之禮不施行幾年宜據經典詳爲其制純奏禮三年  
一祫五年一禘春秋傳曰大禘者何合祭之毀廟之主

陳于太祖未毀廟之主皆升合食太祖五年再殷祭漢  
舊制三年一祫毀廟主合食高廟存廟主未嘗合祭元  
始五年諸王公列侯廟會始爲禘祭又建武十八年親  
幸長安亦行此禮禮說三年一閏天氣小備五年再閏  
天氣大備三年一祫五年一禘父爲昭南向子爲穆北  
向父子不並坐而孫從王父禘之爲言諦諦譏昭穆尊  
卑之義也禘祭以夏四月陽氣在上陰氣在下故正尊  
卑之義也祫祭以冬十月五穀成熟物備禮成故合聚  
飲食也斯典之廢于茲八年謂可如禮施行以時定議



土難復立廟遂以合祭高廟爲常後以三年冬祫五年  
夏祫之時但就陳祭毀廟主而已謂之殷太祖東面惠  
文武元帝爲昭景宣帝爲穆惠景昭三帝非殷祭時不  
祭自是禘祫遂定

志及張純傳

章帝建初七年八月飲酎高廟禘祭光武皇帝孝明皇  
帝甲辰詔書云祖考來格明哲之祀予末小子質又非  
薄仰惟先帝烝烝之情前修禘祭以盡孝敬朕得識昭  
穆之序寄遠祖之思今年大禮復舉加以先帝之坐悲  
傷感懷樂以迎來哀以送往雖祭亡如在而虛空不知

所裁庶或饗之豈亡克謹肅雍之臣辟公之相皆助朕  
之依依今賜公錢四十萬卿半之及百官執事各有差  
紀



臣蔡共武恭校

東漢會要卷五

禮三 吉禮

社稷 五祀

宋 徐天麟 撰

建武二年立大社爰于雒陽在宗廟之右方壇無屋有牆門而已二月八日及臘一歲三祠皆太牢具使有司祠孝經援神契曰社者土地之主也稷者五穀之長也禮記及國語皆謂共工氏之子曰句龍為后土官能平九土故祀以為社烈山氏之子曰柱能植百穀疏自夏



以上祀以為稷至殷以柱久遠而堯時棄為后稷亦植百穀故廢柱祀棄為稷大司農鄭元說古者官有大功則配食其神故句龍配食于社棄配食于稷郡縣置社稷太守令長侍祠牲用羊豕唯州所治有社無稷以其使官古者師行平有載社主不載稷也國家亦有五祀之祭有司掌之其禮簡于社稷云

志注云五祀門戶井竈中雷也

靈星

漢興八年有言周興而邑立后稷之祀于是高帝令天下立靈星祠言祠后稷而謂之靈星者以后稷又配食

星也舊說星謂天田星也一曰龍左角為天田官主穀祀川壬辰位祠之壬為水辰為龍就其類也牲用太牢縣邑令長侍祠舞者用童男十六人舞者象教田初為芟除次耕種芸耨驅爵及穫刈春籟之形象其功也

今注曰元和三年初為郡國立稷及祠社靈星禮器

六宗

安帝元初六年以尚書歐陽家說謂六宗者在天地四方之中為上下四方之宗以元始故事謂六宗易六子之氣日月雷公風伯山澤者為非是三月庚辰初更立



六宗祀于雒陽西北戌亥之地禮比太社也

志

范曄論曰言天地者莫大于易易無六宗在中之象若

信為天地四方所宗是至大也而比大社又為失所難

以為誠矣

按元武紀注云平帝元始中謂六宗為易六

子之氣水火雷風山澤也光武中興遵而不

改至文帝即位初改

為天地四方之宗

紀

祠孔子

建武五年十月光武幸魯使大司空祠孔子

紀

明帝永平二年養三老五更于辟雍郡縣行鄉飲酒禮

于學校皆祀聖師周公孔子牲以犬

志

紀

十五年三月幸孔子宅祠仲尼及七十二弟子親御講

堂命皇太子諸王說經

章帝元和二年春帝東巡狩還過魯幸闕里以太牢祠

孔子及七十二人作六代之樂大會孔氏男子二十以

上者六十三人命儒者講論語帝謂孔僖曰今日之會

于卿宗有光榮乎對曰臣聞明王聖主莫不尊師貴道

今陛下親屈萬乘辱臨敝里此乃崇禮先師增輝聖德

孔僖傳

至于光榮非所敢承帝笑曰非聖者子孫焉有斯言乎

傳



安帝延光三年幸泰山祀孔子及七十二弟子于闕里  
自魯相令丞尉及孔氏親屬婦女諸生悉會賜褒成侯  
以下帛各有差紀

肅宗賜東平王蒼書曰今魯國孔子廟尚有仲尼車輿

冠履明德盛者先靈遠也

東平王傳西征記曰魯人藏孔子所乘車于廟中是顏路

所請者也獻帝時遇火燒之

鍾離意為魯相出私錢付戶曹孔訢修夫子車身入廟  
拭几席劔履男子張伯除堂下草土中得玉璧七枚伯  
懷其一以六枚白意意令主簿安置几前孔子教授堂

下牀首有懸甕孔訢曰夫子甕也背有丹書人不敢發  
意曰夫子聖人所以遺甕欲以垂示後賢因發之中得  
素書文曰後世修吾書董仲舒護吾車拭吾履發吾笥  
會稽鍾離意璧有七張伯藏其一意即召伯問果服焉

鍾離意傳

臣天麟按文王世子曰凡學春官釋奠于先聖先師  
秋冬亦如之又曰凡始立學者必釋奠于先聖先師  
既釁器用幣然後釋菜則知古人建立學校未嘗不  
以祀禮為先也高皇帝雖在倥傯猶能修其祠于過



魯之日武帝興太學而獨未聞釋奠之禮焉明帝行鄉飲于學校祀聖師周公孔子初似未知所以獨崇宣聖之意至永平十五年幸孔子宅祠仲尼章帝安帝皆幸闕里祠孔子作六代之樂則所以崇文重道者至矣使當時儒士之臣能以古人釋奠之禮而推廣之則又何以加焉

### 高禘

仲春之月立高禘祠于城南祀以特牲

禮儀志盧植云元鳥至時陰陽

中萬物生于是以三牲請于於高禘居明顯之處故謂之高因求子故謂之禘以古者有禘氏之官因以為神

### 飲酎

八月飲酎

禮儀志

章帝建初七年八月飲酎高廟

紀

丁孚漢儀曰酎金律文帝所加以正月旦作酒八月成

名酎酒因令諸侯助祭貢金

禮儀志注

### 雜祭祀

仲秋之月祀老人星于國都南郊老人廟季秋之月祠

星于城南壇心星廟

禮儀志

明帝永平二年十一月遣使者以中牢祠蕭何霍光帝



東漢會要 卷五  
五  
謁陵園過式其墓

紀

六年十月行幸魯祠東海恭王陵

紀

十二月還幸陽城遣使者祠中岳

紀

十年幸南陽祠章陵日北至又祠舊宅

紀

十五年幸魯祠東海恭王陵至定陶祠定陶恭王陵

紀

章帝卽位元和二年詔曰山川百神應祀者未盡其議

增修羣祀宜享祀者二月上東巡狩將至泰山道使使

者奉一太牢祀帝堯于濟陰成陽靈臺上至泰山修光

武山南壇兆辛未柴祭天地羣神如故事壬申宗祀五

帝于孝武所作汶上明堂光武帝配如雒陽明堂祀癸

酉更告祀高祖太宗世宗中宗世祖顯宗於明堂各一

太牢卒事遂覲東后饗賜王侯羣臣因行郡國幸魯祠

東海恭王及孔子七十二弟子四月還京都庚申告祠

高廟世祖各一特牛又爲靈臺十二門作詩各以其月

奏之和帝無所增改

志

殤帝延平元年四月詔罷祀官不在祀典者

本紀注云東觀記曰

鄧太后性不好淫祀

安帝延光三年上東巡狩至泰山柴祭及祠汶上明堂



如元和三年故事順帝即位修奉常祀志

桓帝即位十八年好神僊事延熹八年初使中常侍之

陳國苦縣祠老子九年親祠老子於濯龍文廟為壇飾

淳金鉞器設華蓋之座用郊天樂也志

延熹八年四月丁巳壞郡國諸房祀本紀袁紀云壞諸淫祀

縣邑常以乙未日祠先農于乙地以丙戌日祠風伯于

戊地已丑日祠雨師于丑地用羊豕志

范曄論曰臧文仲祀爰居而孔子以為不知漢書郊祀

志著自秦以來訖于王莽典祀或有未修而爰居之類

眾焉世祖中興蠲除非常修復舊祀方之前事邈殊矣

齋

凡齋天地七日宗廟山川五日小祠三日齋日內有汙

染解齋副倅行禮先齋一日有汙穢灾變齋祀如儀大

喪唯天郊越紼而齋地以下皆百日後乃齋如故事禮儀

志

夕牲

正月天郊夕牲晝漏未盡十八刻初納夜漏未盡八刻

初納進熟獻太祝送旋皆就燎位宰祝舉火燔柴火然



天子再拜興有司告事畢也明堂五郊宗廟太社稷六宗夕牲皆以晝漏十四刻初納夜漏未盡七刻初納進熟獻送神還有司告事畢六宗燔燎火大然有司告事畢

禮儀志

### 迎氣

迎時氣五郊之兆自永平中以禮讖及月令有五郊迎氣服色因采元始中故事兆五郊于雒陽四方中兆在東壇皆三階無等立春之日迎春于東郊祭青帝勾芒車旗服飾皆青歌青陽八佾舞雲翹之舞及因賜文

官太傅司徒以下繅各有差立夏之日迎夏于南郊祭赤帝祝融車旗服飾皆赤歌朱明八佾舞雲翹之舞先立秋十八日迎黃靈于中兆祭黃帝后土車旗服飾皆黃歌朱明八佾舞雲翹育命之舞立秋之日迎秋于西郊祭白帝蓐收車旗服飾皆白歌西皓八佾舞育命之舞立冬之日迎冬于北郊祭黑帝元冥車旗服飾皆黑歌元冥八佾舞育命之舞

按本紀永平二年始迎氣于五郊 祭祀志

### 立春

立春之日夜漏未盡五刻京師百官皆衣青衣郡國縣



道官下至斗食令史皆服青幘立青幡施土牛耕人于門外以示兆民至立夏惟武官不立春之日下寬大書曰制詔三公方春東作敬始慎微動作從之罪非殊死且勿案驗皆須麥秋退貪殘進柔良下當用者如故事

禮儀志

縣邑常以立春之日皆青幡幘迎春于東郭外令一童男冒青巾衣青衣先在東郭外野中迎春至者自野中出則迎者拜之而還弗祭三時不迎

祭禮志

### 立夏

立夏之日夜漏未盡五刻京都百官皆衣赤至季夏衣黃郊其禮祠時祭竈

### 夏至

日夏至祭舉大火止炭鼓鑄消石冶皆絕止至立秋如故事是日浚井改水日冬至鑽燧改火云

### 黃郊

先立秋十八日郊黃帝是日夜漏未盡五刻京都百官皆衣黃至立秋迎氣于黃郊奏黃鍾之宮歌帝臨冕而執干戚舞雲翹育命所以養時訓也



立秋

立秋之日夜漏未盡五刻京都百官皆衣白施阜領緣中衣迎氣于白郊禮畢皆衣絳至立冬

立冬

立冬之日夜漏未盡五刻京都百官皆衣阜迎氣于黑郊禮畢皆衣絳至冬至絕事

冬至

冬至前後君子安身靜體百官絕事不聽政擇吉辰而後省事絕事之日夜漏未盡五刻京都百官皆衣絳至

立春諸王時變服執事者先後其時皆一日日冬至夏

至陰陽晷景長短之極微氣之所生也故使八能之士

八人或吹黃鍾之律間竽或撞黃鍾之鐘或度晷景權

水輕重水一升冬重十三兩或擊黃鍾之磬或鼓黃鍾

之瑟軫間九尺二十五絃宮處于中左右為商徵角羽

或擊黃鍾之鼓先之三日太史謁之至日夏時四孟冬

則四仲其氣至焉先氣至五刻太史令與八能之士即

坐于端門左塾大予具樂器夏赤冬黑列前殿之前西

上鍾為端守宮設席于器南北面東上正德席鼓南西



面令晷儀東北三刻中黃門持兵引太史令八能之士人自端門就位二刻侍中尚書御史謁者皆陛一刻乘輿親御臨軒安體靜居以聽之太史令前當軒溜北面跪舉手曰八能之士以備請行事制曰可太史令稽首曰諾起立少退顧令正德曰可行事正德曰諾皆旋復位正德立命八能士曰以次行事間音以竽八能曰諾五音各三十爲闕正德曰合五音律先唱五音並作二十五闕皆音以竽訖正德曰八能士各言事八能士各書板言事文曰臣某言今月若干日甲乙日冬至黃鍾之音調君道得孝道褒商臣角民徵事羽物各一板否則召太史令各板書封以皂囊送西陛跪授尚書施當軒北面稽首拜上封事尚書授侍中常侍迎受報聞以小黃門幡麾節度太史令前白禮畢制曰可太史令前稽首曰諾太史令八能士詣大官受賜陛者以次罷日夏至禮亦如之

合朔

每月朔旦太史上其月歷有司侍郎尚書見讀其令奉行其政朔前後各二日皆牽羊酒至社下以祭日日行



變割羊以祠用救日日變執事者冠長冠衣阜單衣絳領袖緣中衣絳袴練以行禮如故事

五供

正月上丁祠南郊禮畢次北郊明堂高廟世祖廟謂之

五供

並禮儀志

親耕

正月始耕晝漏上水初納執事告祠先農已享耕時有司請行事就耕位天子三公九卿諸侯百官以次耕力田種各耨訖有司告事畢是月令曰郡國守相皆勸民

始耕如儀

志

漢舊儀曰春始耕于藉田官祠先農先農卽神農炎帝也祠以一太牢百官皆從大賜三輔二百里孝弟力田三老帛種百穀萬斛爲立藉田倉置令丞穀皆以給祭天地宗廟羣神之祀以爲粢盛皇帝躬秉耒而耕賀循曰所種之穀黍稷種陸

志注

農祥晨正土膏脉起乘鸞輅而駕蒼龍介馭間以剡耜躬三推于天田修帝藉于千畝供禘郊之粢盛以致思于勤已兆人勸于疆場咸懋力以耘耔

東京賦



東漢會要 卷五  
明帝永平四年二月詔曰朕親耕藉田以祈農事

十三年二月帝耕于藉田禮畢賜觀者食

十五年二月帝耕于下邳

章帝元和三年帝耕于懷

並紀

順帝卽位以後不行藉田之禮黃瓊以國之大典不宜久廢上疏奏曰自古聖帝哲王莫不敬恭明祀增致福祥故必躬郊廟之禮親藉田之勤以先羣萌率勸農功昔周宣王不藉千畝號文公以爲大譏卒有姜戎之難終損中興之名竊見陛下遵稽古之鴻業體虔肅以應

天順時奉元懷柔百神朝夕觸塵埃于道路晝暮聆庶政以卹人雖詩詠成湯之不遑息書美文王之不暇食誠不能加今廟祀適闕而祈穀絜齊之事近在明日臣恐左右之心不欲屢動坐躬以爲親耕之禮可得而廢臣聞先王制典藉田有日司徒咸戒司空除壇先時五百有協風之應王卽齊宮饗體載耒誠重之也自癸巳以來仍西北風甘澤不集寒涼尚結迎春東郊旣不躬親先農之禮所宜自勉以迎和氣以致時風易曰君子自強不息斯其道也書奏帝從之

黃瓊傳



獻帝興平元年帝耕于藉田 紀

親蠶

三月皇后帥公卿諸侯夫人蠶祠先蠶以少牢漢舊儀曰春桑生而皇后親桑于苑中于蠶室養蠶千薄以上祠以中牢羊豕今蠶神曰苑窳婦人寓氏公主凡二神羣臣妾從桑還獻于繭觀皆賜從桑者樂皇后自行凡蠶絲絮織室以作祭服祭服者冕服也天地宗廟羣臣五時之服其皇帝得以作縷縫衣得以作中絮而已置蠶官令丞諸天下官皆能蠶室亦婦人從事故舊有東

西織室作法

志并注

丁浮漢儀曰皇后出乘鸞輅青羽蓋駕駟馬龍旂九旒大將軍妻參乘太僕妻御前鸞旂車皮軒關戟維陽令奉引亦千乘萬騎車府令設鹵簿駕公卿五營校尉司隸校尉河南尹妻皆乘其官車帶夫木官綬從其官屬導從皇后置虎賁羽林騎戎頭黃門鼓吹五帝車女騎夾轂執法御史在前後亦有金鉉黃鉞五將導桑于蠶宮手三盆于繭館畢還宮月令曰禁婦人無觀按谷永對稱四月壬子皇后蠶桑之日也則漢桑亦用四月 志注



祓禩

三月上巳官民皆絜于東流水上洗濯祓除去宿垢疢為大絜絜者言陽氣布暢萬物訖出始絜之矣謂之禩也

請雨

自立春至立夏盡立秋郡國上雨澤若少府郡縣各掃除社稷其旱也公卿官長以次行雩禮求雨閉諸陽衣阜典士龍立土人舞僮二佾七日一變如故事反拘朱索社伐朱鼓禱賽以少牢如禮

桃印

仲夏之月萬物方盛日夏至陰氣萌作恐物不楙其禮以朱索連葦菜彌牟朴蠱鍾以桃印長六寸方三寸五色書文如法以施門戶代以所尚為節夏后氏金行作葦茭言氣交也殷人水德以螺首謹其閉塞使如螺也周人木德以桃為更言氣相更也漢兼用之故以五月五日朱索五色印為門戶飾以難止惡氣

並志

驅劉

立秋之日自郊禮畢始揚威武斬牲于郊東門以薦陵



廟其儀乘輿御戎路白馬朱鬣躬執弩射牲牲以鹿麋  
 太宰令謁者各一人載獲車馳駟送陵廟還宮遣使者  
 齋束帛以賜武官武官肄兵習戰陣之儀斬牲之禮名  
 曰驅劉兵官皆肄孫吳法六十四陣名曰乘之禮儀志  
 又祭祀志云立秋之日使謁者以一特牲祭先虞於壇  
 有事天子八圍射牲以祭宗廟名曰驅劉

臘社

季冬之月星迴歲終陰陽以交勞農大亨臘禮儀志

陳咸王莽時與三子悉解官歸鄉里猶用漢家祖臘漢

行火盛于午故以午日為祖人問其故曰我先人豈知  
 火衰于戌故以戌日為臘也

王氏臘乎陳寵傳

何敞曰今賞賚過度臘賜自郎官以上公卿王侯以下

至于空竭帑藏損耗國資何敞傳注云臘賜大將軍三  
 公錢各二十萬牛肉二百斤

糲米二百斛特進侯十五萬卿十萬校尉五萬尚書三  
 萬侍中將大夫各二萬千石六百石各七千虎賁羽林  
 郎二人共三千以為祀  
 門戶直見漢官儀也

馬防私贍三輔衣冠臘日遺在洛中者錢各五千越騎

校尉光臘用羊三百頭米四百斛肉五千斤漢書

荀彧卒獻帝哀惜之祖日為廢燕樂謂祭社之日  
 為燕樂也共工氏



東漢會要 卷五  
之子好遠遊祀以為祖  
漢以午日祀 荀彧傳

### 大儺

先臘一日大儺謂之逐疫其儀選中黃門子弟年十歲以上十二以下百二十人為儺子皆赤幘阜製執大鼗方相氏黃金四目蒙熊皮元衣朱裳執戈揚盾十二獸有衣毛角中黃門行之冗從僕射將之以逐惡鬼於禁中夜漏上水朝臣會待中尚書御史謁者虎賁羽林郎將執事皆赤幘陞衛乘輿御前殿黃門令奏曰儺子備請逐疫于是中黃門倡儺子和曰甲作食殤胃食虎雄

伯食魅騰簡食不祥攬諸食咎伯奇食夢強梁祖明共食磔死寄生委隨食觀錯斷食巨窮奇騰根共食蠱凡使十二神追惡凶赫女驅拉女幹節解女肉抽女肺腸女不急去後者為糧因作方相與十二獸儺嚙呼周徧前後省三過持炬火送疫出端門門外騶騎傳炬出宮司馬闕門門外五營騎士傳火棄雒水中百官官府各以木面獸能為儺人師訖設桃梗鬱備葦茭畢執事陞者罷葦戟桃杖以賜公卿將軍特侯諸侯云

禮儀志

卒歲大儺驅除羣癘方相秉鉞巫覡操蒟



丹首元製桃弧棘矢所發無臬音刈飛礮雨散剛瘳以斃

煌火馳而星流逐赤疫于四裔然後凌天池絕飛梁捎

螭魅斲獮社斬蛟蛇腦方良囚耕父于清冷溺女魃于

神潢殘夔魑與罔象殪野仲而殲游光八靈為之震懼

况魃蠱與畢方度翔作梗守以鬱壘神荼副焉對操索

葦日察區陬司執遺鬼京室謐清罔有不戢東京賦

安帝永初三年竇太后以陰陽不和詔減逐疫侷子之

半后紀

土牛

十二月立土牛六頭于國都郡縣城外丑地以送大寒

志



臣蔡共武恭校



